

Hommage Mustafi Šehoviću



Mustafa Šehović

uslove rada, dr. Mustafa Šehović pored redovnog posla neumorno je radio i u područnim dispanzerima. Prosto je nemoguće ne spomenuti njegov uspješan rad i na polju zdravstvenog prosvjeđivanja o tuberkulozi i poboljšanja opštih i ličnih higijenskih prilika stanovništva. Sve je to doprinijelo da se u relativno kratkom vremenskom periodu broj oboljelih od tuberkuloze na području njegovog djelovanja značajno smanji.

Sklonost nastavničkom radu i želja da svoje znanje prenese mladima usmjerila ga je još kao mladog ljekara u pravcu pedagoškog rada. Godinama je bio nastavnik Srednje medicinske škole, a kasnije profesor pneumoftiziologije Medicinskog fakulteta u Tuzli. Uvijek pristupačan i prijateljski raspoložen, bio je omiljen među učenicima i studentima. Vazio je za uglednog profesora čija su predavanja bila interesantna i dobro posjećena. Za svoje učenike i studente napisao je više udžbenika i nekoliko zdravstveno-prosvjetnih brošura koje uglavnom razmatraju probleme tuberkuloze u smislu zdravstvene zaštite stanovništva. Kao autor ili koautor objavio je više članaka u stručnim časopisima. Interesovao se za istoriju medicine tuzlanskog kraja i o tome napisao nekoliko članaka u medicinskim časopisima.

Dr. Mustafa Šehović više od 50 godina davao je nemjerljiv doprinos u radu i organizaciji Crvenog krsta opštine Tuzla, Crvenog krsta Bosne i Hercegovine i Crvenog krsta Jugoslavije. Insistirao je na principu dobrovoljnosti kao vrhunskom načelu pokreta. Danima i godinama svoje slobodno vrijeme provodio je na poslovima organizacije Crvenog krsta i zdravstvenog prosvjeđivanja stanovništva sela i grada, bilo usmenom ili pisanom riječju, dajući istovremeno primjer mlađima kako se volonterskim radom može pomoći drugim osobama i društvu u cjelini. Za svoj doprinos u organizaciji i radu Crvenog krsta dobio je za života i posthumno značajna priznanja.

Pored stručnog medicinskog znanja dr. Mustafa Šehović imao je i široko obrazovanje iz društvenih i humanističkih znanosti. Poseban interes pokazivao je za književnost, pozorište, opštu istoriju i istoriju medicine. U književnoj literaturi je nalazio svoje utočište i svoj smiraj. Bio je nepokolebljivi krležijanac, ali se nije odricao ni Selimovića ni Andrića ni drugih. I sam je amaterski pisao pjesme i kratke priče od kojih su neke emitovane u literarnim emisijama Radija Tuzla.

Dr. Mustafa Šehović dugi niz godina bio je istaknuti društveni radnik u političkim i kulturnim institucijama. Bio je poslanik Socijalno-zdravstvenog vijeća Bosne i Hercegovine u dva saziva, odbornik u Narodnom odboru opštine Tuzla, predsjednik Opštinskog odbora Crvenog krsta u Tuzli, predsjednik Glavnog odbora Crvenog krsta Bosne i Hercegovine, delegat Skupštine Crvenog krsta Jugoslavije, član Upravnog odbora Udruženja pneumoftiziologa Jugoslavije, član Upravnog odbora Kluba javnih radnika opštine Tuzla i drugih kulturnih i stručnih institucija. Na prvim višestranačkim izborima 1990. godine izabran je za poslanika Socijalističke Republike Bosne i Hercegovine. Tu dužnost obavljao je sve do 1996. godine. Od 1996. do 1998. godine bio je poslanik Predstavničkog doma parlamenta Federacije Bosne i Hercegovine.

Od brojnih priznanja koje je dr. Mustafa Šehović dobio, treba izdvojiti stručno zvanje primarijusa, Orden rada sa zlatnim vijencem, Orden rada sa srebrenim vijencem, Plaketu grada Tuzle, Lopara, Kladnja, Gračanice i Plaketu Društva Ljekara Bosne i Hercegovine, Spomen povelju SR Srbije te brojna priznanja Crvenog krsta.

Mustafa Šehović je bio čovjek velike erudicije sa širokim krugom interesa. Svojom stručnošću i savjesnim radom na svim poljima svog djelovanja stekao je veliki ugled i poštovanje u narodu i među svojim saradnicima.